

tio est simplex: sed eo sensu, quod non sit composita ex pluribus sui generis, i. e. ex aliis enunciationibus. Quod autem hæc acceptio vocis simplex sit hujus loci, ex opposito infallibiliter colligi potest. Corpus quippe simplex in physicis opponitur corpori mixto, id quod exinde perspicere est, quod corpus in genere soleat dividi in simplex & mixtum, tanquam membra opposita. Sicut ergo corpus mixtum illud dicitur, quod ex aliis corporibus (elementis scil.) est compositum: ita è contrario corpus simplex est, quod ex aliis corporibus (nimirum elementis) non est compositum; utut alias varia compositionis realis genera ipsi competant. Jam ad id, quod in eodem §. motum fuit dubium, facilis est responsio. Tum scil. demum implicaret contradictionem, aliquid esse corpus, & simul esse simplex, si simplex priori modo, pro eo scil. quod non est compositum ex materia & forma acciperetur. At verò aliquid esse corpus, & simul esse simplex posteriore modo non implicat contradictionem. Alio enim respectu est corpus, alio item simplex, qui diversus respectus tollit contradictionem. Et patet inde, cur vox simplex in descriptione cœli posita sit, nimirum, ut per eam excludatur mixtum, quod quamvis sit corpus, non tamen est cœlum,

L 2

quia